

遙縣志卷之九上

人物志

山川靈淑之氣鍾毓於人則其志必高其品必超其
行誼必卓然於流俗之上如孫子荆之在晉祖孫父
子世濟其美洵稱一代偉人自唐迄明若梁若杜若
范若劉勳業彪炳節義昭著固皆足爲枌榆光矣我
國家久道化成生是邦者或德被於鄉鄰或望重於閭
里或以忠孝立名或以文章傳世或則山林悅志或
則巾幗垂型要皆靈秀所鍾不容湮沒且平邑土厚

風醕冠蓋往來名哲寄跡亦足以增榮桑梓是宜博採芳蹤廣稽輿論彙輯成帙用代表揚

懿行

晉

孫楚字子荆太原中都人祖資魏驃騎將軍父宏南陽太守楚才藻卓絕爽邁不羣少欲隱居謂王濟曰吾欲漱石枕流濟曰流可枕石可漱乎曰枕流欲洗其耳漱石欲礪其齒年四十餘始參鎮東軍事爲石苞作遺孫皓書詞義剴切後遷衛將軍司馬時龍見武

庫井中羣臣將入賀楚獨勸帝舉賢任能修德彌變
惠帝初爲馮翊太守卒子三衆恂纂纂子統善屬文
人稱其有楚風厯勤餘令統弟綽另有傳

孫綽楚孫隱居會稽游放山水十餘年作遂初賦後作
天台山賦辭致甚工示友人范雲期曰卿試擲地可
作金石聲也除著作郎累遷散騎常侍桓溫將移都
洛陽人莫敢先諫綽上疏極陳利害溫見疏不悅曰
致意興公何不尋君遂初賦而知人國家事耶轉廷
尉卿領著作

孫盛字安國祖楚馮翊太守父恂潁川太守恂在郡遇
賊被害盛年十歲避難渡江及長博學善言名理嘗
著醫卜及易象妙於見形論一時名流無以難之起
家佐著作郎以家貧親老求爲小邑出補瀏陽令太
守陶侃請爲參軍庾亮代侃引爲征西主簿時丞相
王導執政亮以元舅居外因讒搆導亮頗懷疑貳盛
密諫亮曰王公神情朗達常有世外之懷豈肯爲凡
人事耶此必邪佞之徒欲閒內外耳亮納之尋遷廷
尉正桓溫伐蜀盛以參軍俱往蜀平賜爵安懷縣侯

累遷溫從事中郎從入關平洛以功進封吳昌縣終
秘書監加給事中卒年七十二盛篤學不倦自少至
老手不釋卷著魏氏春秋晉陽秋并造詩賦論難復
數千篇晉陽秋詞直而理正咸稱良史焉旣而桓溫
見之怒謂盛子曰枋頭誠爲失利何至乃公所說此
史遂行自是關君門戶事其子拜謝因請刪改盛性
方嚴諸子乃共號泣稽顙請爲百口計盛大怒不從
諸子潛改之初盛寫定兩本寄於慕容雋後於遼得
盛書以相考校多有不同書遂兩存子潛字齊由豫

章太守次子放字齊莊幼令惠六七歲與父從庾亮
獵亮謂曰君亦來耶卽應聲曰無小無大從公於邁
亮又問曰欲齊何莊耶放曰欲齊莊周亮曰不慕仲
尼耶答曰仲尼生而知之非希企所及亮大奇之仕
至長沙相

論曰子荆興公安國父子祖孫風格高俊文詞淹雅
京雒江表世濟其美稱一代偉人前賢收入志中止
及馮翊而遺綽與盛余按譜牒孫氏實太原中都人
平遙於晉屬太原國中都漢文帝舊封也高祖平定

代地立子恒爲代王都晉陽後都中都魏廢爲縣今
在邑城西北十二里然則子荆之爲平人無疑矣送
別古詩冠於藝文天台一賦亦快錄焉文獻之足徵
不亦彰明較著哉

唐

裴誨吏部冢宰

裴岫宜春縣尉

裴堯長興節度使推官虞部郎中

裴志左諫議大夫

梁思字恭其先安定人思幼好儒術重交遊值朝廷用
師奮身從戎累功加上柱國大厯十二年卒年八十
七

五代

薛融以文學知名初仕唐爲左補闕直宏文館晉高祖
鎮太原融爲觀察使高祖卽位拜吏部郎中遷中書
舍人融辭文館非所長不拜召修洛陽宮殿融上書
切諫高祖嘉納遂罷其役遷御史改尚書右丞

宋

侯仁寶父益仕周累封齊國公宋初加中書令仁寶以
廕入官出知邕州太宗時上言取交州之策授交州
戶丁陸計度轉運使子延齡殿中丞延世太子中舍
侯延廣太宗時出護延州李繼遷寇靈州以爲甯州團
練使戎人服其威名皆引避及病言家受國恩今日
得死所但未立尺寸功以報上耳言訖而卒

李彥哲屢有武勳加陞兵馬大元帥至今子孫繁衍

裴羽壽安縣尉

裴定大理評事歷禮部侍郎

裴口口戶部尚書

裴宜大理寺評事

元

裴完監察御史

裴見素工部尙書

裴能永平府照磨以上皆晉公度後也

論曰裴氏之昌皆自晉國族尊望重歷代爲雄居聞
喜者爲裴潛遷關中之白水者爲裴徽分居平遙則
自裴輯始然其譜次亦多殘缺漶漫矣

杜遇仕元爲評事儉靜仁慈周貧賑急妻死誓不再娶
人稱長者

梁秉鈞字仲平仕元爲評事性寬厚純粹善與人交鄉
黨稱之子七人長瑜次玫三瑛四珪五珍六瓊七琮
梁瑜性純厚體貌魁梧年二十四爲本邑令寬仁有容
吏民懷之卒於官

梁瑛性孝友正直醕儉有大志善騎射勇力絕人金末
中原兵起所在郡邑望風奔潰元太師國王領兵南
下公曰天也死填溝渠何益遂率衆詣軍門上謁即

授元帥左監軍撫定居民攻諸城堡公屢出奇計招降百餘所又從國王掠霍沁又入關定秦隴錫虎符陞行都元帥以縣行平安州事兵火之餘公安集有法人始息肩武仙陷平陽公進兵仙大敗棄城走己丑入覲授金符御前千戶扈從南征至鳳翔西和興元數城俱下壬辰兵次唐鄧公當前鋒與金兵戰於三峰山大破之時軍民降附日衆他將以糧不給謀盡殺之公曰殺降不祥凡隸麾下悉得不死其離散而復合者俾藉於民幾三千餘人乙未從元帥塔海

甘不入蜀宋人守瞿塘兵不克進公作皮渾航以濟
塔奇之奏權征行萬戶留鎮興元戊戌又從塔公圍
資州踰月始下塔怒欲悉坑之公曰今始得一城而
坑之他城未易下也塔善其說公喜曰吾起身鞍馬
閒不啻百數十戰未嘗敗北所全活者亦不下數萬
計壬寅平成都丁未公年五十七告老不允詔充西
京平陽太原京兆延安五路萬戶治太原子翼襲行
軍千戶公以太原初定民多離散請於朝給復三年
四方來歸者三萬餘戶刑簡令信境內以甯尋卒於

里第年六十有六子四羽太原路管軍千戶天翔少
中大夫四川肅政廉訪使珙先亡長卽翼也後遷成
都轉運使孫十一偉宜武將軍行軍總管儀偁傑秦
王府侍衛補太原路管軍千戶佐時中時正時仁時
義曾孫十四思賢思敬行軍千戶追封安定郡侯贈
亞中大夫

論曰瑛以熊羆之姿遭逢時會奮身百戰爵列通侯
子孫奕奕累世承休不可謂極盛哉跡其平生臨戎
仗鉞每以不殺爲主三峰之敗資州之降全活至數

十萬人嗟夫何其仁也語曰全國爲上又曰上帝好
生若瑛者雖古名將胡以加焉世遠時移今相去幾
五百餘年而梁氏子孫蟬聯不絕代有興者其亦陰
德之所貽留歟

梁琮繼其兄瑜爲本邑令長子翔次子翥翥子用剛用直
李思溫光祿大夫

李光甫光祿大夫

李郁朝列大夫

杜珪字舜臣杜珪第二子宣授河東南北路奧魯萬戶

侯

杜豐字唐臣祖遇父珪積德好施鄉稱善人豐喜讀書尤好孫武吳起及王遁之書少有大志倜儻不羣以兵法爲金平遙義軍謀克累遷行軍萬戶佩銀符元兵取太原豐率部來降國舅按赤那延授兵馬都提控從國王按察兒攻平陽設方略諭以禍福招集三萬餘戶悉令安堵賜金虎符授征行元帥左監軍金人南遁遂以豐守河北庚辰上黨張開以萬衆寇汾州豐率精騎五千大破之從國王阿察兒下懷孟破

溫谷木澗等地攻洪洞西山斬首六百餘級攻平山
破之賊墮崖死以萬計掠獲甚衆金將武仙等來掠
平陽太原閒道路梗絕授豐龍虎衛上將軍河東南
北路兵馬都元帥便宜行事遂破玉女割渠等寨俘
獲千餘人丙戌從按赤那延攻益都下登萊己丑取
沁州銅鋹武鄉襄垣綿山沁源諸縣皆下辛卯命撫
定平陽太原真定遼沁皆平之乙未陞沁州長官長
官者元初高爵也在沁十餘年寬役薄賦勸課農桑
時有被驅三百餘口男女之無室家者悉配之招降